

Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՊԱՏԳԱՍԸ
ԲԵՈՒՆԻ ՄԱՅՐ ՏԱՃԱՐՈՒՄ ՄԻՋԵԿԵԴԵՑԱԿԱՆ ԱՐԱՐՈՂՈՒԹՅԱՆ ԸՆԹԱՅՔՈՒՄ

(21 հոկտեմբերի 2017 թ.)

Հոգեւոր եղբայրներ ի Քրիստոս, Գերմանիո իշխանությանց մեծարգո ներկայացուցիչներ, սիրելի քույրեր եւ եղբայրներ.

Աղոթքի այս պահին Մենք գոհունակ սրտով փառք ենք տալիս Աստծուն, որ առիթը շնորհեց մեզ Բեռլինի պատմական այս Մայր Տաճարում համախմբվելու եւ համատեղ աղոթքի ներշնչումով խորհրդածելու աշխարհում քրիստոնեության, ի մասնավորի Մերձավոր Արեւելքում մեր քրիստոնյա եղբայրների ու քույրերի վիճակի մասին՝ իբրեւ բնաբան ունենալով Տեր Հիսուս Քրիստոսի կողմից մեզ տրված Նոր Օրենքը՝ «Երանիները» (Մատթ. Ե. 2-12): Արդի աշխարհում՝ մարդկային թշվառությանց ու տառապանքների, հալածանքների եւ հասարակական աղետների պայմաններում, որքան ավելի կարեւոր ու կենսական են հնչում Տիրոջ՝ Լեւոն բարձունքից արտասանած այս անանց խոսքերը...

Քրիստոնեության տարածման առաջին իսկ օրերից Երանիներն ընկալվել են իբրեւ Քրիստոսի ու քրիստոնյայի նմանության, Հիսուս Քրիստոսին օրինակելու եւ Նրա գծած ճանապարհով ընթանալու ուղեցույց: Արդի մտածողությամբ՝ Երանիներն ասես յուրաքանչյուր քրիստոնյայի անձնագիրն են, փաստաթուղթը, որով քրիստոնյան, իր կյանքում ու գործերում, ճանաչվում է, նույնացվում՝ իբրեւ Քրիստոսի հետեւորդ: Արեւելյան Ուղղափառ Եկեղեցիները, եւ ընդհանրապես քրիստոնեական ողջ աշխարհը հենց այս հետեւորդությամբ, Երանիների տված պատգամի լույսի ներքո են կառուցել հավատի իրենց հոգեւոր տունը՝ նմանվել ու օրինակել երկնավոր Վարդապետին՝ իբրեւ հոգով աղքատ, իբրեւ սգավոր, իբրեւ արդարության քաղցն ու ծարավն ունեցող, իբրեւ ողորմած, իբրեւ սրտով մաքուր, իբրեւ խաղաղարար, վերջապես՝ իբրեւ արդարության ու Տիրոջ անվան համար հալածվող: Մեր Եկեղեցիների պատմությունը, մարտիրոսագրության ու հավատի՝ երբեմն աներեւակայելի սխրանքների առկայությամբ, փաստել է Հիսուսի կողմից տրված այս խոստման ու պատգամի հանդեպ անմնացորդ հավատարմությունը: Մենք աղքատացել ենք հոգով՝ ապաշխարության ու աղոթքի միջոցով շարունակ փորձելով հարստանալ երկնքի արքայության գանձերով, սգացել ենք՝ անմոռունչ

աղոթելով աշխարհի վերափոխման ու չարիքի վերացման համար, մեզ պատճառված վշտերի ու տառապանքների համար՝ մշտապես բարձրաձայնել արդարության վերահաստատման պահանջը եւ մաքառել հանուն արդարության վերականգնման, ողորմությունն ու մարդասիրությունը նկատել ենք իբրեւ սրտի մաքրության առհավատչյա՝ արդարության ու Տիրոջ անվան համար հալածվելիս անգամ չդադարելով խաղաղության հաստատմանն ուղղված աղոթական եւ գործնական քայլերը:

Սիրելի՛ քույրեր եւ եղբայրներ, Եվրոպայում Ռեֆորմացիայի 500-ամյա հոբելյանի տոնախմբությանց շրջագծում մեր հոգեւոր մեկտեղման այս պահին եկե՛ք նախ հոգու աղոթական զգացողությանը ելնենք Գալիլիայի ծովակին մերձակա Լեռան բարձունքին, ծնկենք Տեր Հիսուսի ոտքերի առջեւ. եկե՛ք մրմունջով եւ աղոթքին հատուկ լեզվով այսօրվա մեր եղբայրների ու քույրերի համար նորովի կրկնենք Երանինների պատգամը.

Երանի՛ բոլոր նրանց, ովքեր նյութական ու մարմնական աղքատության մեջ չեն մոռանում հոգեւոր հարստության մասին՝ մշտապես ձգտելով երկնաքաղաքացիություն:

Երանի՛ բոլոր նրանց, որ չեն մոռանում տառապյալներին ու հալածվողներին՝ իրենց սրտով կարեկցելով եւ ձեռքերով բարձրացնելով նրանց դժվարություններից:

Երանի՛ բոլոր նրանց, ովքեր ամեն անձի՛ մեջ են գտնում Աստծուն՝ մոտենալով Նրան եւ իրականություն դարձնելով Տիրոջ պատգամը. «Այս է իմ պատուէրը, որ սիրէք միմեանց, ինչպէս որ ես սիրեցի ձեզ» (Յովհ. ԺԵ. 12):

Երանի՛ բոլոր նրանց, ովքեր խաղաղություն են հաստատում աշխարհում՝ ի խնդիր մարդկային հասարակության մեջ աստվածապարգեւ արժեքների տարածման ու պահպանման:

Երանի՛ բոլոր նրանց, ովքեր անդադրում աղոթում ու տքնում են քրիստոնյաների միջեւ միության հաստատման եւ աշխարհում կրոնական հանդուրժողականության ամրապնդման համար:

Երանի՛ նրանց, որովհետեւ նրանք բոլորն էլ Տիրոջ առաքյալներն ու աշակերտներն են, օրինակողները երկնավոր Վարդապետի կյանքի եւ գործերի:

Երանինների պատգամը երբեւէ, առավել եւս մեր օրերում, չի փոխվել. այն միշտ մեր առջեւ բացում է սիրո եւ աստվածամանության ուղին: Մեր օրերում, երբ Մերձավոր Արեւելքում կրոնական անհանդուրժողականությունն ու բախումները դարձել են այնտեղ ապրող անմեղ մարդկանց կյանքի եւ առօրյայի անբաժան մաս, երբ կրոնական ատելության հողի վրա սպանություններն ու հալածանքները դարձել են կրոնական ծայրահեղականների գաղափարախոսություն, երբ հազարամյակների



«Երանի բոլոր նրանց, ովքեր խաղաղություն են հաստատում
աշխարհում...»



Ն. Ս. Օ. Տ. Տ. Գարեգին Բ. Ամենայն Հայոց Կաթողիկոսի
հանդիպումը Գերմանիայի Դաշնային Հանրապետության նախկին
նախագահ արն Յոհակիմ Գաուլի հետ

կրոնամշակութային արժեքների ոչնչացումն ու քրիստոնեությունից բնօրաններ հանդիսացող վայրերից բնիկների բռնի արտագաղթն իրականացվում է կրոնի պատգամների խեղաթյուրված եւ եղծված հիմնավորմամբ, Երանիները կրկին ու կրկին առիթ են տալիս ամենքիս, անկախ կրոնադավանական պատկանելությունից եւ քաղաքական հայացքների տարբերությունից, վերանորոգելու մեր պատրաստակամությունը՝ Տեր Հիսուս Քրիստոսի մատնանշած երանության եւ սրբության ուղին համատեղ անցնելու համար:

Սիրելիներ՛ր, աղոթենք միասին՝ Տիրոջ հրավերն արժանավայել ընդունելու եւ նրա մատնանշած սրբության ուղին անցնելու համար: Այն ուղղված է ամենքիս՝ Մերձավոր Արեւելքում թե Եվրոպայում, Ամերիկյան մայրցամաքում թե Հեռավոր Արեւելքում. ամենքս անձնապես կոչված ենք տարածողներն ու ամրապնդողները լինելու Տիրոջ այս նոր օրենքի, օրենք, որ արձանագրված է ոչ թե քարեղեն, այլ հոգեւոր տախտակների վրա՝ մարդկանց հոգիներում: Թող Տիրոջ շնորհները մարդկանց սրտերում արգասավորվեն՝ Նրա խոսքի համաձայն՝ մեկին երեսուն, մեկին վաթսուն եւ հարյուր, այսօր եւ միշտ. ամեն:

